


Ponemento di Prome Piedra Centro Historico

BOARUBA | ban renoba nos isla



“Nos mester rescata nos
centronan di ciudad, rescata
edificionan historico y
monumental di nos pais pa
por duna realse y contenido
na pais Aruba y su historia”

ORANJESTAD – Un producto diferente di Aruba y alabes un inyeccion den e economia local, cu lo trece su efectonan pa un y tur riba e isla, ta e intencion tras di e vision di Gabinete Mike Eman cu realisacion di e Plan BoAruba, bou cual ta cay tur e renobacionnan cu ta tumando luga y lo bay tuma luga rond di Aruba. “Durante e hopi debatenan cu tabatin riba e rumbo cu nos pais mester scoge, nos a pone hopi cla cu nos mester rescata nos centronan di ciudad, rescata edificionan historico y monumental di nos pais pa por duna realse y contenido na pais Aruba y su historia. Den e cuadro aki nos a presenta un programa cu nos comunidad a apoya. For di momento cu Gobierno nobo a sinta, a cuminsa traha duro pa ehecuacion di e plan aki cu nos a duna e nomber BoAruba y cu ta incorpora

den dje restauracion di edificionan historico den nos barionan, mehora e calidad di bida den Aruba completo, percura pa bon infraestructura y edificio di grandinan, scolnan, etc. Tambe proyecta Aruba como un pais caminda ta busca e progreso den mehora y profundisa e calidad di e producto Aruba,” Prome Minister Mike Eman a splica. E proyecto di Centro Historico ta un proyecto cu lo bay wordo realisa door di Albo Aruba, cu tabatin e miho oferta, aunque mas caro di loke Gobierno tabatin presupuesta. Sinembargo a sinta na mesa pa logra baha cierto gastonan te cu a logra yega na e 18 miyon cu Gobierno a pone disponibel pa e proyecto aki. Lo bay construi un edificio moderno acopla na e actual Bestuurskantoor.

E lo ta un compleho completo caminda e historia di pais Aruba ta keda ilustra den dje. E edificio moderno, ta hiba Aruba den un otro epoca. Awe prome di september lo bay tin ponemento di e prome bloki pa construcion di e Centro Historico Arubano. Hunto cu e proyecto di e edificio, henter e plaza rond, e caya entre Fort Zoutman te cu unda antes tabata Museo Arkeologico, lo bira Plaza Padu Lampe, formando parti di Centro Historico. E mandatario a expresa tambe cu e ta contento cu den tur e proyectonan aki, e idea tras di tur plan ta pa rescata historia di Aruba. “Ta dunami hopi satisfaccion cu nos por a yega na tempo aki pa por rescata e centro

di nos ciudad y cu nos por a cuminsa e proyectonan pa renoba, remodela y restaura no solamente centro di ciudad, pero barionan y infraestructuranan”. El a splica cu e edificio nobo, ta uno moderno, loke ta e exigencia ora ta construi banda di un edificio historico. E construcion nobo semper mester ta mensahe cla cu ta algo di un otro epoca. Pa loke ta e proyecto, e mandatario a bisa cu esaki ta otro 18 miyon cu ta bay circula den e economia local, saliendo for di fondonan di FDA, realoca den acuerdo cu Hulanda. E restauracion aki ta bay duna realse na centro di ciudad, combina cu tur e otro proyectonan ta pone Aruba atrobe ‘den un plano di calidad, caminda nos por mustra cu nos ta un isla turistico bunita, pero cu nucleonan historico. Tin biaha bo por haci un inversion den

algo cu na e momentonan ey tin su efectonan economico, pero ora cu e caba di wordo construi su efectonan economico ta bay bahando. Pero ora bo haci inversionnan pa mehora e calidad di e producto, tanto pa e ciudadano como e bishitantenan, e efectonan ta perdura pa tempo largo,” e mandatario a expresa. El a agrega cu di e manera aki ta cumpli cu dos meta pareu: mehoracion di producto Aruba y na mesun momento ta percura pa un inyeccion den e economia, cu su efectonan ya caba ta wordo sinti. Eman a duna e ehempel di e proyeccion di Banco Central cu e economia di Aruba lo crece cu sigur 10% na 2011. Algo cu Aruba por ta orguyoso di dje como isla chikito, sigur mirando tur e problemanan cu tin rond mundo.



WWW.BOARUBA.COM